

## **Uunga siunnersuut: Sinerissap qanittuani qaleralinniarneq pillugu Namminersorlutik Oqartussat nalunaarutaat nr. xx xxx 2018-imeersaq**

Aalisarneq pillugu Inatsisartut inatsisaanni nr. 18, 31. oktober 1996-imeersumi, kingullermillu Inatsisartut inatsisaatigut nr. 28, 28. November 2016-imeersukkut allanngortinneqartumi § 10, § 10a, § 13, imm. 2 aamma imm. 3, § 23, § 33, imm. 1, nr. 3 aamma imm. 2 aamma § 34, imm. 3 naapertorlugit aalajangersarneqarpoq:

### *Attuuffia*

§ 1. Sinerissap titarnerullu aalisarnikkut oqartussaaffiup tunngaviusumik killingata 3 sømilinik avataaniittup akornanni angallatit 75 BRT imaluunniit 120 BT-mit mikinerusut atorlugit inuussutissarsiutigalugu qaleralinniarnermi nalunaarut atuuppoq.

### *Nassuiaatit*

§ 2. Sinerissap qanittuani qaleralinniarnermi aqutsiveqarfiit ukua aalajangersaavigineqarput:

- 1) Aqutsiveqarfik Upernavik, imatut nassuiarneqarpoq nunap sumiiffia 71° 30'N-ip avannaanit aamma 75° 00'N-ip kujataanut, nunap ilaani sinerissamit tassungalu kangerluit atasut aamma tunngaviusumik killeqarfiit 3 sømilit avataanut. . Uummannap aqutsiveqarfiani 71° 30'N-ip avannaani nunap ilaani kangerluit ataqatigiissut immikkut ittuupput.
- 2) Aqutsiveqarfik Uummanaq, imatut nassuiarneqarpoq nunap sumiiffia 70° 30'N-ip avannaanit aamma 71° 30'N-ip kujataanut nunap ilaani sinerissamit tassungalu kangerluit atanillit aamma tunngaviusumik killeqarfiit 3 sømilit avataanut. Tamatuma saniatigut kangerluup eqqaa 70° 30'N-p kujataani Ikerasaap sullua aamma Qarassap Imaa kiisalu kangerluit 71° 30'N-ip avannaani, erseqqarinnerusumik kangerluit ataqatigiissut: Karrat Kangerluat, Kangilleq, Ingia Fjord, Ukkusissat Kangerluat, Kangiusap Imaa, Umiiviup Kangerlua aamma Nuugaatsiap Tunua aqutsiveqarfimmut ilaapput.
- 3) Aqutsiveqarfik Qeqertarsuup Tunua, imatut nassuiarneqarpoq nunap sumiiffia 68° 52,5'N-ip avannaanit 70° 30'N-ip kujataanut nunap ilaani sinerissamit tassungalu kangerluit atanillit sanianiittut kiisalu tunngaviusumik killigititamit 3 sømilit avataanut. Uummannap aqutsiveqarfiani 70° 30'N-ip kujataani nunap ilaa immikkut ittuuvoq.
- 4) Aqutsiveqarfik Nuuk, imatut nassuiarneqarpoq nunap sumiiffia Nuup Kangerlua aamma Ameral-lip Kangerlua nunallu ilaani sinerissamut qanittoq tassungalu kangerluit atasut 64°00'N-ip aamma 64°07,5'N-ip akornaniittut aamma tunngaviusumik killigititamit 3 sømilit avataanut.
- 5) Kalaallit Nunaata avataani aqutsiveqarfiit nr. 1-4-miittut Kalaallit Nunaata aqutsiveqarfiit ilaatut taaguuserneqassapput. Aqutsiveqarfik Kalaallit Nunaata Ilaani imatut nassuiarneqarpoq sinerissamit nunap ilaa aamma tunngaviusumik killigititamit 3 sømilinut aqutsiveqarfiit immikkut ittut.

*Inuussutissarsiutigalugu qaleralinniarnermi angallatit*

§ 3 Aqutsiveqarfinni Upernavimmi, Uummannami, Qeqertarsuullu Tunuani angallatit 19,99 BRT imaluunniit 31,99 BT-mit anginerusut atorlugit inuussutissarsiutigalugu qaleralinniarnissaq akuerisaanngilaq.

*Akuersissutit, pisassiissutit aqutsiveqarfiillu*

§ 4. Angallatit 6 m (tamarmiusumik takissusaa) tikillugit angissusillit atorlugit imaluunniit taakku inorlugit angissusilinnik inuussutissarsiutigalugu qaleralinniassagaanni, tamatumunnga akuersissummik peqarnissaq piumasagaataavoq, tak. imm. 4.

*Imm. 2.* Angallatit 6 m sinnerlugu tamakkiisumik angissusillit (tamarmiusumik takissusaa) atorlugit inuussutissarsiutigalugu qaleralinniassagaanni, tamatumunnga akuersissummik peqarnissaq piumasagaataavoq. Akuersissummi angallat sorleq FTJ-mik normoqarluni imaluunniit GR-mik normoqarluni atorneqarnersut allanneqassaaq.

*Imm. 3.* Angallatip takissusaa pillugu nalornisoqartillugu, takuuk imm. 1 aamma 2, nutaamik uuttortaasoqareerpat Aalisarsinnaanermut Akuersissutinik Nakkutilliisoqarfik aalajangiissaaq.

*Imm. 4.* Angallammut 6 m tikillugu (tamarmiusumik takissusaa) tamakkiisumik angissusilimmuut akuersissut aamma qimussimik qamuterallannillu qaleralinniarnermut atorneqarsinnaavoq.

§ 5. Aqutsiveqarfinni § 2-mi taaneqartuni sinerissamut qanittumi qaleralittarineqarsinnaasunut pisassiissutit ukiut tamaasa uumassusilerinikkut siunnersuineq tunngavigalugu Naalakkersuisut aalajangersartassavaat.

*Stk. 2.* Aqutsiveqarfiit Upernavik, Uummannaq Qeqertarsuullu Tunua eqqarsaatigalugit angallatinut 6 meteri tamakkiisumik sinnerlugu (tamarmiusumik takissusaa) aamma angallatinut 6 meteri tamakkiisumik (tamarmiusumik takissusaa) imaluunniit inorlugu angissusilinnut immikkut pisassassiissutinik aalajangersaasoqassaaq.

§ 6 Angallammut tamakkiisumik 6 meterimut (tamarmiusumik takissusaa) qaleralinniarsinnaanermut akuersissutinik ukununnga tunniussisoqartassaaq:

1) Aqutsiveqarfinnut Upernavimmut, Uummannamut aamma Qeqertarsuup Tunuanut piffissami kil-liligaanngitsumi aamma pisassat amerlassusaat qaffasinnerpaamik akuerisaasoq aalisarsinnaanermut akuersissutit tunniunneqartassapput.

2) Nuummi aqutsiveqarfinnut akuersissutit piffissamik killilerlugit pisassallu tamakkiisumik qaffasinnerpaaffissalerlugit ukiut ataasiakkaarlugit aalisarsinnaanermut akuersissutit tunniunneqartassapput.

3) Aqutsiveqarfimmuut Kalaallit Nunaata Ilaanut akuersissutit piffissamik killilerlugit annerpaamik ukiut ataasiakkaarlugit pisarineqarsinnaasut qaffasinnerpaaffissaannik qummut killiliinngitsumik tunniunneqartassapput.

§ 7 Angallammut tamakkiisumik 6 meterimut (tamarmiusumik takissusaa) imaluunniit minnerusu-mut qaleralinniarsinnaanermut akuersissutinik ukununnga tunniussisoqartassaaq:

- 1) Aqutsiveqarfinnut Upernavimmut, Uummannamut aamma Qeqertarsuup Tunuanut piffissamut killilimmut aamma pisassat amerlassusaat qaffasinnerpaamik akuerisaasoq aalisarsinnaanermut akuersissutit tunniunneqartassapput.
- 2) Aqutsiveqarfik Nuummumut akuersissutit piffissamut killilimmut aamma pisarineqarsinnaasunut qaffasinnerpaaffilernagit akuersissutit tunniunneqartassapput..
- 3) Aqutsiveqarfimmi Kalaallit Nunaata sinneranut akuersissutit piffissamik killilerlugit tunniunneqartassapput aalisarneqarsinnaasullu qaffasinnerpaaffissaannik qummut killiliinngitsumik.

*Imm. 2.* Akuersissutit imm. 1 naapertorlugu sivisunerpaamik ukioq ataaseq atuuttussatut tunniunneqartassapput.

§ 8 Aqutsiveqarfinni Upernavimmi, Uummannammi aamma Qeqertarsuup Tunuani qaleralinniar-nissamut akuersissutit aqutsiveqarfinni 3-ni taaneqartuni tamani atorneqarsinnaaapput, kisianni aq-utsiveqarfinni Nuummi aamma Kalaallit Nunaata Ilaanut atorneqarsinnaanngillat.

*Imm. 2.* Taamaattorli imm. 1 malillugu akuersissummik pigisalik imm. 1 apeqquaatinnagu aq-utsiveqarfimmi allami pisassiissutit tamarmiusut 10 %-annik taamaallaat aalisarsinnaavoq.

*Imm. 3.* Aqutsiveqarfinnut Nuummumut Kalaallit Nunaatalu Ilaanut akuersissutit taamaallaat aq-utsiveqarfinni taakkunani atorneqassapput.

#### *Inuussutissarsiutigalugu qaleralinniarnermi piniutit atorneqartut*

§ 9. Qassutinik qalorsuorsorluniluunniit inuussutissarsiutigalugu qaleralinniarneq inerteqqutaa-voq.

*Imm. 2.* Kommunit ileqqoreqqusaliaanni imm. 1-imi immikkut akuersissuteqarsinnaanermut ma-littarisassanik erseqqinnerusunik aalajangersaasoqarsinnaavoq, taamaalilluni aalisarfinni piffissanilu killilersorluni qassusersorluni aalisarnissaq akuerineqarsinnaavoq.

*Imm. 3.* Taamaattorli Aalisarnermut, Piniarnermut Nunalerinermullu Naalakkersuisoq, qassuser-sorluni aalisarneq piffissami aalajangersimasumi matuneqassasoq aalajangiisinnaavoq, tak. imm. 2, tamanna pisassiissutitigut pissutsit pisariaqartilerpasuk imaluunniit qalerallit tunisassiarineqar-ne-risa pitsaassusaat pitsanngortinniarlugu.

§ 10. Qaleralinniarnermi atortoq atortunut allanut minnerpaamik 50 meterinik ungasissusilerlu-gu inissinneqassaaq.

*Imm. 2.* Atortut marluk nermussimatillugit, nammineq atortut killorlugit nermussimasut piiarneqartassapput.

*Imm. 3.* Aalisarunnaartoqartillugu aalisartoq pineqartoq pisariaqanngitsumik kinguarsaanani atortumi qaqinnissaanut pisussaavoq.

*Immikkut akuersinerit*

§ 11. Aalisarnermut, Piniarnermut Nunalerinermullu Naalakkersuisoq § 4, imm. 1 aamma 2 naapertorlugit aalisarnissamut akuersissummik piumasaaqammut immikkut akuersissuteqarsinnaavoq, Qaanaami najugalinnut nunaqarfiinilu, Illoqqortoormiuni nunaqarfiinilu kiisalu Tasiilami nunaqarfiinilu najugalinnut.

*Pineqaatissiissutaasinnaasut*

§ 12. § 3, § 4, imm. 1 aamma 2, § 9, imm. 1, kiisalu § 10-imik unioqqutitsisoqartillugu, Kalaallit Nunaanni Pinerluttulerinermut Inatsimmi malittarisassat malillugit akiligassiisoqarsinnaavoq imaluunniit arsaarinnittoqarluni.

*Imm. 2.* Imm. 1 malillugu akiligassiinissamik imaluunniit arsaarinnittoqarnissaanik aalajangiineq pinerluttulerinermut inatsimmi malittarisassat malillugit inatsisilerinermi immikkoortunut inuttut isigineqarsinnaasunut aamma atuuppoq.

*Imm. 3.* Imm. 1 aamma 2 malillugit suliat Kalaallit Nunaanni Eqqartuussivimmuut suliaqartussatut siullertut suliakkiutigineqassapput.

*Imm. 4.* Akiliisitsissutit imm. 1-3 malillugit pineqaatissiissutigineqartut Nunatta Karsianut pisanngortinneqassapput.

*Atortuulerfia*

§ 13. Nalunaarut ulloq 1. januar 2019-mi atortuulissaaq.

*Imm. 2.* Peqatigitillugulu Sinerissap qanittuani qaleralinniarneq pillugu Namminersorlutik Oqartussat nalunaarutaat nr 11, 28. august 2014-imeersoq atorunnaarsinneqarpoq.

*Kalaallit Nunaanni Namminersorlutik Oqartussat, ulloq xx.xxx. 2018*

Nikkulaat Jeremiassen

/

Jørgen Isak Olsen